



25. august 2014

UKA 2014/48

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Ineqarnermut tapiissutit pillugit Inatsisartut inatsisissaannik Naalackersuisut saqqummiussinissamik peqquneqarnissaannik aalajangiiffigisassatut siunnersuut. Inatsisissatut siunnersuutip qulakkiissavaa ullumikkut ineqarnermut taperseeriaaseq atorunnaarsinneqassasoq aqqissuuseriaatsimillu nutaamik pilersitsisoqassasoq, taamaaliornikkut inoqutigiit amerlassusaat aammalu isertitaat aallaavigalugit ineqarnermut tapiissuteqalissaaq, taannalu qinnutigineqartalissaaq inip attartukkap attartortitsisuanut. Inatsisartut inatsisissaattut siunnersuut kingusinnerpaamik 2015-mi Inatsisartut ukiakkut ataatsimiinneranni saqqummiunneqassaaq.

(Inatsisartunut ilaasortat Knud Kristiansen aamma Gerhardt Petersen, Atassut)

Tunngavilersuut:

ATASSUT-mit ilisimaarivarput maannakkut ineqarnermut tapiissuteqarnermik aqqissuusineq atuuttoq 2001-milu atuutilersinneqartoq (Inatsisartut peqqussutaat nr. 3 31. Maaji 2001-meersoq), pilersinneqarsimasoq sukumiisumik aqqissuusseqqinnissamik suliaqareernerup kingorna. Maannakkut ukiut 13-t ingerlareerput piffissanngorporlu aqqissuusisimanerup misissuataaqqinnissaa pissutsinullu maannakkut atuuttuusunut tunngaviusumik tulluarsarneqarnissaa.

ATASSUT-mit naleqquttuosorinngilarput ineqarnermut tapiissutinik qinnuteqartarnerup isumaginninnermik inatsisip ataani inissisimatinneqarnissaa, isumaqarattami ineqarnermut akiliutit aammalu ineqarnermut akiliutinik tapiissutaasinnaasut ineqarnermut susassaqrifiup iluaniittariaqartoq taamaasillunilu aamma ineqarnermut inatsisit iluaniilluni.

Taamaasilluni ATASSUT aamma isumaqarpoq, kommunit ineqarnermut tapiissutinik qinnuteqartarneq imaluunniit ineqarnermut akiliutinut tapiissutit allaffissornikkut nammattussaannikkai.

Inunnik isumaginninnermut attuumassuteqanngilaq kisimiittuulluni ilinniarsimanani pilersuisuuneq, ilinniartuuneq imaluunniit utoqqartut innuttaaqataaneq. Taamaattumik isumaqarpugut, siunissami ineqarnermut akiliutinut tapiissutinut qinnuteqarniaraanni tamanna inimik attartortitsisumut qinnutigineqartariaqassasoq, tamannalu amerlanertigut pisarpoq A/S Boligselskabet INI, Iserit A/S imaluunniit Illuut A/S-mut.

Ullumikkut ineqarnermut tapiissutit 40 procent-imik kommunemit aamma 60 procent-imik Namminersorluni Oqartussanit aningaasalersorneqartarput. Naleqquttuosorinngilarput taamatut avitseqatigiilluni ingerlatsisoqarnera, pissutsit ajornerpaaffianni siunertarineqanngitsumik aningaasannanniarfiusinnaaneramik kinguneqarsinnaammat.



ATASSUT INATSISARTUNI

ATASSUT-mit naleqqunnerusorivarput, attortortitsisup ineqarnermut akiliutinut tapiissutinut (ineqarnermut tapiissutit) aningaasartuutinik Namminersorlutik Oqartussanut uppersaateqarnermigut utertitsivigineqarsinnaasoq. Taamaasilluni qitiusumiit ingerlanneqarlutillu nakkutigineqarsinnaalissapput utertitsisarnermut aqqissuussineq. Taamaasilluni taava aamma kommunitut tapiissutit appartinneqartariaqassapput kommunit ineqarnermut akiliutinut tapiissutinut 40 procent-imik tapiissuteqartarnerata nalinganik.

ATASSUT-mili pingaartipparput naqissusissallugu, ineqarnermut akiliutinut tapiissutinut maannakkut aqqissuussisimanerup nutaamik taarserneqarluni aqqissuussinissamik suliaqarnerup peqqissaarulluarneqarnissaa. ATASSUT isumaqarpoq aqqissuussinerup attartortartuvut akisussaassuseqarluartumik pissusilersornerulernissaannik kajumittitsilissasoq aammalu attartortitsisartutta attartortartut sannginnerusut soqutigisaat aammalu atugarisaat eqqumaniarfiginerulernissaannut kajumittitsilissasoq.

Tassa taamatut tunuliaquteqarluni ATASSUT matumani aalajangiiffigisassatut siunnersuut saqqummiuppaa.

Pisortanut aningaasatigut allaffissornikkullu kingunerisassat:

Naatsorsuutigineqarpoq siunnersuut kissaatigineqartoq Namminersorlutik Oqartussanut allaffissornerunermik kinguneqassasoq. Missiliuutigineqarporlu suliap katillugu AC-fuldmægtig-imik ukiup affaaniit ukiup iluitsup tungaanut sulisoqarneq tassani nutserineq ilanngutereerlugu, tamanna 250.000-miit 500.000 koruunit tungaanut naleqarsinnaavoq.

Namminersorlutik inuussutissarsiuteqartunut aningaasatigut allaffissornikkullu kingunerisassat:

Soqanngilaq.

Innuttaasunut aningaasatigut allaffissornikkullu kingunerisassat:

Soqanngilaq.